

Le molbo e le calceas

Un molbo haveva venite al urbe. Ille bibeva un poco troppo pro su sete. In su via de retorno, ille deveniva fatigate. Ille cadeva al cammino e se addormiva. Ille haveva fin e nove calceas sur le gambas.

Un povre vagabundo, qui passava, los observava. Su proprie calceas esseva multo vetule e plen de foramines. Ille se decideva rapidamente a remover le fin calceas del molbo e le mitteva su proprias in vice. Allora ille se hastava via.

Un poco plus tarde un homine passava in coche. Ille critava al molbo dormiente sur le cammino:

“Retira tu gambas, o io passa super illos!”

Le molbo se eveleva e regardava su gambas in le calceas miserabile. Ille non poteva creer que illesseva su proprie gambas e diceva:

“Rola tu solamente avanti! Il non es mi gambas.”


Traduction: Jørgen Kofod-Jensen (1996)

VOCABULARIO

calcea vestimento pro le gamba – sete forte desiro de biber qualcosa – **cammino** via, strata – **foramine** apertura que da passage – **coche** carrossa



foramine in le muro



carrossa tirate per un cavallo



■ Mols es un parte geographic del peninsula danese Jutlandia. Mols es ric de collinas. Le habitantes de Mols es appellate *molbos* e es considerate un poco stupide per le daneses. Assi existe multe historias del molbos.

QUESTIONES AL HISTORIA

Que faceva le molbo in le urbe? Quando on ha sete, que desira on haber?

Esque le molbo esseva lassate con pedes nude?

Como eveleva le molbo?

Explica que es un vagabundo. Proque voleva le vagabundo prender le calceas del molbo?

Proque critava le homine in le coche al molbo?

Que esseva le reaction del molbo?